

Iluarsiissut

23. oktober 2018-imeersoq taarserpaa

(Siunnersuummik saqummiussisup aqqa allanngortinneqarpoq).

Aningaasartuutit suulluunniit Inatsisartunit taakkulu allattoqarfianit aningaasartuutigineqartut kikkunit tamanit takuneqarsinnaanngornissaat pillugu taamatullu kikkut tamarmik paasiniaasinnaanngornissaat pillugu Inatsisartut Suleriaasiata allanngortinnissaanut Inatsisartut Siulitaasoqarfiat siunnersuuteqaqqullugu peqquneqarnissaanik Inatsisartut aalajangiiffisassaattut siunnersuut.

(Inatsisartunut ilaasortaq Niels Thomsen, Demokraatit)

Akissuteqaat

(Inatsisartut Siulittaasuat)

Siullermeerinnineq.

Inatsisartut ataatsimut isigalugu kikkunnit tamanit paasisaqarfigineqarsinnaalernissaanik siunnersuutaanut Inatsisartunut ilaasortaq Niels Thomsen, Demokraatineersoq, Siulittaasoqarfiup qutsavigaa.

Pisortat aningaasaataannik atuineq pillugu ammanerusumik pissuseqarnissamik ilaasortap tunngaviusumik isumaa Siulittaasoqarfimmit tunngaviatigut isumaqatigineqarpoq. Paatsuunganartoqaqqunagu oqaatigineqassaaq Ombudsmandeqarfik aamma Inatsisartut ataanni suliffeqarfiummat.

Taamaalilluni aningaasartuutitut takussutissianik paasitinneqarnissamik qinnuteqaatinik Siulittaasoqarfiup akuersissuteqarsinnaanermut piginnaatitaanermigut pisortat aningaasaataannik atuinermi Siulittaasoqarfik ammasumik ingerlatsereerpoq, soorluttaaq Inatsisartut pillugit Siulittaasup ukiumoortumik nalunaarutaani paasissutissat sukumiisut, tassungalu ilanngullugit Inatsisartut ataanni aningaasaliissutit ilaasortanut, Siulittaasumut, ataatsimiititalianut allaffissornermullu qanoq atorneqartarnerat takuneqarsinnaasoq.

Aammattaq Inatsisartut Siulittaasuata ilassinninnernut angalanernullu aningaasartuuteqartarneranut, akeqanngitsunik ajunngitsorsiaanut tunissutinillu pissarsisarneranut malittareqqusani allassimavoq aningaasartuutitut takussutissat, malittareqqusat malillugit aningaasartuutigineqartut, tamanit paasisaqarfigineqarsinnaassat. Kiisalu Inatsisartunut ilaasortat angalaneranni ilanngussat tamarmiusut Siulittaasoqarfimmit tamanut paasisaqarfigineqarsinnaasunngortinneqarsinnaasut Inatsisartunut ilitersuummi aamma allassimavoq.

Taamaalilluni Siulittaasoqarfimmit ukiorpassuarni misilittagarineqarlunilu periuserineqarpoq ilanngussanik takunnissinnaatitsisoqartareersoq.

Paasitinneqarnissamik qinnuteqaammik akuersinissani itigartitsinissaniluunniit Siulittaasoqarfiup nammineerluni aalajangersinnaagaa aalajangiiffigisassatut siunnersuummi allassimavoq. Tassunga atatillugu Siulittaasoqarfimmit tamanut eqqaasitsittutigineqartariaqarpoq Siulittaasoqarfimmi ilaasortat partiinit arlalinneersuummata aammalu Suleriaaseq pillugu Ataatsimiititaliaq partiinit tamanit ilaasortaaffigineqarmat, tassanilu Inatsisartut sulineranni pissutsit atuuttut pillugit suliassanik ilaasortat suliassangortitsinnaallutik, tassungalu ilaavoq aalajangiiffigisassatut siunnersuummi saqqummiunneqartumi siunnersuutigineqartutut najoqqutassiassanik suliqaarnissap qinnutigineqarsinnaanera.

Pineqartoq pillugu najoqqutassanik allanik Siulittaasoqarfiup suliqaarsinnaanera Siulittaasoqarfimmit akornutissaqarsorineqanngilaq, soorluttaaq Inatsisartut ataanni suliffeqarfinnilu Inatsisartut ataanniittuni pissutsit amerlasuut allat pillugit Siulittaasoqarfik najoqqutassanik nalinginnaasumik suliqaartartoq.

Inatsisartut ataanni aningaasaliissutit ukiut arlallit ingerlaneranni aalaakkaasimasut aningaasanut inatsisini atuarneqarsinnaavoq, naak Inatsisartunut ilaasortat, taamatullu allaffissornermi suliassat assorsuaq amerleriarsimasut. Kingullermik ilaasortat sullinneqarnerisa pitsanngorsarneqarnissaat kissaatigalugu partiinut tapiissutit amerlineqarput.

Taamaalilluni inatsisissatut siunnersuutit Inatsisartut ukiumut marloriarlutik katersuunneranni sularineqartut amerlieriarujussuarnerisigut Inatsisartut ataatsimiinneri ukiut kingullit ingerlaneranni sakkortuseriarujussuarsimapput. Tamatumani suliassat Inatsisartunit sularineqartussat amerliartuinnarnerinut allaffissornerup naleqqussarnissaa soorunami pisariaqarpoq. Tamatuma saniatigut ataatsimiinnernut nutserinernullu aningaasartuuteqartoqartarpoq. Taamatuttaaq § 37 naapertorlugu apeqqutit amerliartorsimapput. Suliassat tamarmik Inatsisartogarnermi sulineranut tunngasuupput aammalu pisariaqartitsinermut naleqqussartoqartuartaqarpoq.

Taamatuttaaq Inatsisartutigit sulinermi illutatigut atugassarititaasut naammaginangitsut pillugit siunnersuutit arlallit ukiuni arlalinni sularineqartarsimapput, tamatumani sulisunut ilaasortanullu illutatigut atugassarititaasut ullutsinnut tulluarunnaavissimallutik, tamannalu amerlasuutigut naleqqussaanernik ajornartorsiutinik piffissamat sivikitsuinnarmut aaqqiissutaasunik nassataqartarluni. Suliassat tamarmik aningaasaliissutit allaffissornerullu naammaginartumik pitsaassuseqarnissaa anguniarlugu oqimaaqatigiissaariffiusariaqartarput, tamatumalu peqatigisaanik suliassanut amerliartortunut allaffissornerup eqaatsuunissaa qulakkeerniarneqartariaqarluni.

Tamannalu Inatsisartut ukiumoortumik nalunaarutaanni takutinneqartarpoq, tassanilu Inatsisartut ingerlatsineranni aningaasaliissutit atorneqarnerat pillugu paasisaartoqarsinnaalluni. Aningaasartuutillu taakku paasitinneqarnissamik qinnuteqarnissamat tunngavissiiisimappata oqaatigineqareersutut taakku akuerineqarnissaannut Siulittaasoqarfik akuersisarsimavoq.

Taamaalillunilu ilaasortap aalajangiiffigisassatut siunnersuutaani pingaarnertut siunertarineqartutut aningaasartuutinut ilanngussanik paasitinneqarnissamat paasitinneqarsinnaanermut inatsisit kisimi atuutinngilaq, pisortalli ingerlatsineranni suliassaqarfinnut arlalissuarnut atuulluni. Pisortat ingerlatsinerannut Inatsisartut ilaanngillat,

taamaattumillu paasitineqarsinnaanermut inatsimmi maleruagassat Inatsisartut ingerlatsinerannut taassumaluunniit ataani suliffeqarfinnut atuutinngillat.

Inatsisartut suliassaat taamaalillutik pissaanermik atuutsitsisut suliassaannit allaanerupput, taamaattumillu taakkununga ataasiakkaarlutik sanilliunneqarsinnaanatik.

Folketingip ingerlatsinerani paasitineqarsinnaanermut maleruagassat assingi atuuttut qanoq atuunnerat folketingip nittartagaani assersuutitut takuneqarsinnaapput.

Folketingip ingerlatsinera pillugu paasitineqarsinnaanermut maleruagassat inatsisini tunngaviusuni taamatullu Folketingip suleriaasiani nassaarineqarsinnaapput.

Inatsisini tunngaviusuni § 49 naapertorlugu Folketingip ataatsimiinneri tamanut ammasuupput. Taamaalillunilu siunnersuutit isumaqatigiinniarnerrillu Folketingimi tamanut ammasuupput.

Folketingip ataatsimiititaliaanni ataatsimiinnerit aallaaviatigut matoqqasuupput, ataatsimiititaliilli aalajangersinnaavaat ataatsimiinnerit ammasuussanersut imaluunniit ataatsimiinnerit immikkoortuisa ilaat, assersuutigalugu siunnersuinerit ammasuussanersut.

Folketingimi inatsisartutigoortumik allagaatit il.il. takuneqarsinnaanerat pillugu Folketingi maleruagassiorsimavoq.

Folketingi Folketingip nittartagaanni paasissutissanik arlalinnik tamanut saqqummiussisarpoq. Folketingi pisortat ingerlatsinerannut ilaanngilaq, taamaattumillu paasitineqarsinnaanermut inatsimmi maleruagassat Folketingip ingerlatsineranut atuutinngillat. Taamaattumillu Folketingip ingerlatsinerani paasissutissat qanoq annertutigisut tamanut paasissutissiissutigineqarnissaat Folketingip nammineq aalajangertarpaa.

Folketingimi taamatullu Inatsisartuni sulineq sanillersuunneqarsinnaalluarput.

Pisortat ingerlatsinerannut Inatsisartut ilaanngillat, taamaattumillu paasitineqarsinnaanermut inatsimmi maleruagassat Inatsisartut ingerlatsinerannut atuutinngillat. Taamaattumillu ingerlatsinertik pillugu maleruagassat Inatsisartunit nammineq aalajangiiffigineqartarlutillu aalajangersarneqartarput.

Inatsisartuni oqallinnissaq qilanaaraara.